

VENDIM
Nr. 511, datë 4.9.2018

**PËR ZHVILLIMIN E STËRVITJES “ALBANIAN LION 2018” DHE PJESËMARRJEN E
FORCAVE USHTARAKE TË MBRETËRISË SË BASHKUAR TË BRITANISË SË
MADHE DHE IRLANDËS SË VERIUT, REPUBLIKËS SË KROACISË DHE
REPUBLIKËS SË KOSOVËS NË STËRVITJEN E PËRBASHKËT, NË KUADËR TË
BASHKËPUNIMIT SHUMËPALËSH**

Në mbështetje të nenit 100 të Kushtetutës dhe të neneve 11, shkronja “ç”, e 14, pika 1, shkronja “b”, të ligjit nr. 9363, datë 24.3.2005, “Për dërgimin e Forcave të Armatosura të Republikës së Shqipërisë jashtë vendit, si dhe për mënyrën e procedurat e vendosjes dhe të kalimit të forcave ushtarake të huaja në territorin e Republikës së Shqipërisë”, të ndryshuar, me propozimin e ministrit të Mbrojtjes, Këshilli i Ministrave

VENDOSI:

1. Zhvillimin e stërvitjes “Albanian Lion 2018” dhe pjesëmarrjen e forcave ushtarake të Mbretërisë së Bashkuar të Britanisë së Madhe dhe Irlandës së Veriut, Republikës së Kroacisë dhe Republikës së Kosovës në stërvitjen e përbashkët, në kuadër të bashkëpunimit shumëpalësh.

2. Lejimin e hyrjes në territorin e Republikës së Shqipërisë të 902 (nëntëqind e dy) trupave ushtarake të Mbretërisë së Bashkuar të Britanisë së Madhe dhe Irlandës së Veriut, Republikës së Kroacisë dhe Republikës së Kosovës, pjesëmarrës në stërvitjen “Albanian Lion 2018”.

3. Qëllimi i kësaj stërvitjeje është realizimi i operacioneve joluftarake të evakuimit, nëpërmjet detit dhe ajrit, duke përfshirë anije luftarake zbarkuese, helikopterë dhe forca speciale për veprimtaritë në tokë.

4. Stërvitja “Albanian Lion 2018” do të zhvillohet në periudhën 8–30 shtator 2018 në gadishullin e Karaburunit, bazën e Pashalimanit, bazën e Porto-Palermos, bazën ajrore të Rinasit, në Bizë, kepin e Palit dhe Zall-Herr.

5. Në këtë stërvitje angazhohen 902 (nëntëqind e dy) trupa ushtarake të Mbretërisë së Bashkuar të Britanisë së Madhe dhe Irlandës së Veriut, Republikës së Kroacisë dhe Republikës së Kosovës, 2 (dy) anije luftarake (një anije transportuese detare dhe një anije zbarkuese), 1 (një) helikopter për evakuim mjekësor, 3 (tre) avionë ushtarakë HAWK të Mbretërisë së Bashkuar të Britanisë së Madhe dhe Irlandës së Veriut dhe 1 (një) anije për luftë kundër minave e Republikës së Kroacisë.

6. Trupat ushtarake të Mbretërisë së Bashkuar të Britanisë së Madhe dhe Irlandës së Veriut dhe të Republikës së Kroacisë, gjatë hyrjes, qëndrimit dhe daljes nga territori i Republikës së Shqipërisë, do të kenë statusin e parashikuar në marrëveshjen ndërmjet palëve të Traktatit të Atlantikut të Veriut për statusin e forcave të tyre, nënshkruar në Londër, më 19 qershor 1951, dhe të ratifikuar nga Kuvendi i Republikës së Shqipërisë me ligjin nr. 10101, datë 26.3.2009.

7. Trupat ushtarake të Republikës së Kosovës, gjatë hyrjes, qëndrimit dhe daljes nga territori i Republikës së Shqipërisë, do të kenë statusin e parashikuar në marrëveshjen ndërmjet Republikës së Shqipërisë dhe Republikës së Kosovës për statusin e anëtarëve të Forcave të Armatosura të Republikës së Shqipërisë dhe Forcës së Sigurisë së Republikës së Kosovës gjatë qëndrimit të tyre të përkohshëm në territorin e shteteve përkatëse, dhe të ratifikuar nga Kuvendi i Republikës së Shqipërisë me ligjin nr. 8/2014.

8. Gjatë hyrjes, qëndrimit e daljes nga territori i Republikës së Shqipërisë, trupat ushtarake të Mbretërisë së Bashkuar të Britanisë së Madhe dhe Irlandës së Veriut, të Republikës së Kroacisë e Republikës së Kosovës do të shoqërohen nga njësi të armatosura të Forcave të Armatosura të Republikës së Shqipërisë.

9. Ngarkohen ministri i Mbrojtjes, ministri i Brendshëm, ministri i Financave dhe Ekonomisë dhe ministri i Infrastrukturës dhe Energjisë për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Edi Rama